

Masalah bekalan ikan, ayam semakin pulih

BH 8/6/2022 ms. 8

Alor Setar: Keadaan cuaca yang dijangka pulih menjelang hujung bulan ini dijangka mampu mengatasi masalah kekurangan hasil laut terutama bekalan ikan apabila nelayan mula dapat keluar ke laut.

Pengerusi Persatuan Nelayan Kebangsaan (NEKMAT), Abdul Hamid Bahari, berkata pihaknya menjangkakan nelayan mampu mendaratkan ikan hingga 600,000 tan berbanding hanya 300,000 tan sepanjang tempoh dua bulan kebelakangan ini.

"Masalah kekurangan bekalan ikan berlaku disebabkan beberapa faktor termasuklah keadaan cuaca tidak menentu, kekurangan tenaga pekerja asing dan kos diesel bot nelayan kelas C2.

"Namun, kami yakin isu pendaratan ikan berkurangan yang berlaku hingga menyebabkan kenaikan harga ikan di pasaran akan pulih semula pada akhir

bulan ini," katanya dihubungi semalam.

Sebelum ini, media melaporkan pendaratan ikan terutama di utara Semenanjung berkurangan hingga 70 peratus iaitu daripada lebih sejuta tan kepada kira-kira 300,000 tan sebulan berikutan keadaan cuaca tidak menentu sejak dua bulan lalu.

Kekurangan bekalan ikan itu menyebabkan harga ikan di pasaran meningkat antara 10 hingga 20 peratus berikutan permintaan orang ramai yang tinggi ketika ini.

Mengulas lanjut, Abdul Hamid berkata, pihaknya berharap kerajaan dapat mempertimbangkan semula pemberian subsidi minyak kepada bot nelayan kelas

C2 yang menjadi penyumbang terbesar tangkapan ikan negara. Bot kelas C2 memerlukan sekurang-kurangnya RM45,000 untuk membeli diesel sebanyak 10,000 liter setiap kali keluar ke laut selama beberapa hari.



Abdul Hamid Bahari

"Harga diesel untuk bot kelas C2 kini mencecah RM4.70 se-liter berbanding RM1.65 liter bagi bot kelas A, B dan C. Saya yakin jika nelayan kelas C2 turut mendapat subsidi, maka mereka dapat mendaratkan lebih banyak ikan.

Mengenai stok ikan, beliau memaklumkan buat masa ini NEKMAT masih memiliki kira-kira 30 tan stok ikan sejuk beku untuk menampung permintaan pengguna sebelum pendaratan ikan pulih.

Sementara itu di Kota Bharu, tinjauan di Pasar Besar Siti Khadijah semalam mendapati bekalan ayam segar di Kelantan sudah pulih sejak seminggu lalu apabila peniaga memperoleh jumlah yang mencukupi daripada pembekal.

Semua peniaga mendapat bekalan ayam daripada pembekal dan pemborong sama ada dari Kelantan atau Perak.

Peniaga ayam, Rusmini Hanafi, 48, berkata dia mendapat ayam yang cukup sebanyak 300 ekor sehari, berbanding sekitar 100 hingga 150 ekor sehari sebelum ini.

"Alhamdulillah bekalan ayam sudah cukup, namun harganya tinggi sedikit menyebabkan tidak ramai pelanggan datang membeli di kedai.

"Namun, saya bersyukur kerana ada pelanggan tetap seperti pengusaha kantin hospital dan pemilik kedai makan yang me-

ngambil bekalan dengan saya," katanya yang sudah berniaga ayam lebih 20 tahun.

Pemborong ayam, Kamariah Hanafi, 58, berkata dia mendapat bekalan ayam daripada pembekal antara 500 hingga 800 ekor sehari. Ayam diperoleh daripada pembekal dengan harga RM8.90 sekilogram sebelum dijual kepada penjual dan peruncit.

"Bekalan ayam sudah pulih, namun harga makin naik, saya hanya dapat untung yang kecil tapi tak mengapa asalkan bekalan setiap hari habis dijual," katanya.

Pembeli, Abdul Kadir Ali, 73, berkata, harga ayam sangat mahal iaitu RM9.50 sekilogram menyebabkan pengguna rasa terbeban.

"Saya harap kerajaan memantau harga ayam memandangkan bekalan sudah pulih dan saya lihat bekalan ayam di pasar juga banyak," katanya.